

Segirar il nivel da las rentas en l'avegnir

L'Uniun sindacala svizra tschenta accents per 2017

DA LUCAS DEPLAZES / ANR

■ **Segirar il nivel da las rentas per l'avegnir, cumbatter la dischoccupaziun e rinforzar la situaziun dals consumers, quai èn las finamiras da l'Uniun sindacala svizra. Las premias per las cassas da malsauns duain vegnir limitadas.** L'Uniun sindacala svizra quinta per l'onn 2017 cun in augment dal product naziunal brut dad 1,5% ed ina chareschia da plus 0,3%. La quota da dischoccupaziun vegn a restar cun 3,3% pli u main stabila. Il sindicat ha calculà la cumpart da las personas senza lavur sin 4,7%. Nauschas perspectivas ha il sindicat formulà per il svilup da las rentas.

Per *Paul Rechsteiner*, il president da l'Uniun sindacala svizra, è la quota da dischoccupaziun en Svizra fitg auta. El ha constatà che la dischoccupaziun è sa sbassada en ils Stadis Unids ed en la Germania ils ultims onns. En Svizra è il dumber da dischoccupads s'augmentà ed ha surmuntà la quota da la Germania. Quai na saja anc mai succedì, ha constatà Rechsteiner. Tenor ses parairi èsi perquai gist ch'il parlament ha integrà en la lescha davart la migraziun la proposta dal sindicat d'annunziar plazzas vacantas al Center regional per intermediaziun da lavur. L'avegnir vegn a demussar sche la preferenza dals dischoccupads vegn respectada en cas da remplazzaments en ils secturs cun ina dischoccupaziun sur la media. La nova lescha garantisce il mantegniment da las cunvegns bilaterals ed impedischa regulaziuns discriminantas sco il statut da stagiunar.

Las ovras socialas sut squitsch

Las ovras socialas pateschan sut ils tschains negativs, principalmain las cassas da pensiun. Per quest motiv pretenda l'uniun sindacala da dispensar il chapital da l'AVS dals tschains negativs da la Banca naziunala. Quella incassescha var 1,2



Conferenza da medias da l'Uniun sindacala svizra dad ier a Berna.

KEYSTONE

milliardas francs l'onn tals tschains negativs. L'uniun sindacala propona da restituir questa summa a las cassas da pensiun cun transferir la summa dad 1,2 milliardas francs al fond da segirtad. En vista al svilup negativ tar las cassas da pensiun saja ina tala mesira giustifitgada, manegia Rechsteiner.

Da gronda muntada è la revisiun da la prevenziun per la vegliadetgna 2020 che vegn uss deliberada en il parlament. Rechsteiner fa allusiun a las propostas dal cussegl dals chantuns. Quellas procurassian per ina guliavaziun da las perditas tar las cassas da pensiun, fissan pia acceptablas. Las ideas da la cumissiun dal cussegl naziunal perencunter avessan per consequenza massivs reduziuns da las

rentas en l'avegnir. L'Uniun sindacala svizra vegn a prender la decisiun davart in eventual referendum en sia radunanza extraordinaria dal mais da mars proxim, uschè svelto sco las decisiuns dal parlament èn conuscentas. Mo il sistem da repartiziun sco quai è il cas tar l'AVS garantisce ina cumpensaziun da las perditas tar las cassas da pensiun. Da patrar dattan plinavant l'augment da las premias per las cassas da malsauns. Quellas duain vegnir limitadas sin 10% da las entradas.

Impuls fiscals èn necessariis

Daniel Lampart, il scheconom da l'Uniun sindacala svizra, ha constatà in flavel creschament da l'economia en

Svizra ils ultims onns. Dapi l'onn 2008 è il product naziunal brut s'augmentà mo per 0,8%, calculà per persuna. En la Germania han ins calculà l'augment sin 4%. Lampart dat la culpa a la politica monetara da la Banca naziunala. Senza l'augment da la valur dal franc svizzer – che è survalità – fiss la quota per la Svizra s'augmentada sin var 3000 francs per persuna. L'effect dal schoc dal franc svizzer custia a nus var 25 milliardas francs. Qua tras han impurtantas spartas da nosa economia d'export (industria da maschinas e d'electro) subì grondas perditas finanzialas ed ina reduziun dals posts da lavur per 14%. Necessaris sajan ussa novs impuls per l'economia empè da reduziuns da taglia per interpresas.